

22890/P

TENTAMEN PATHOLOGICUM
IN AUGURALE,
DE
DELIRIO FEBRILI:

Q U O D,

ANNUENTE SUMMO NUMINE,

Ex Auctoritate Reverendi admodum Viri,

GULIELMI ROBERTSON, S. S. T. P.

ACADEMIÆ EDINBURGENÆ PRÆFECTI;

N E C N O N

Amplissimi SENATUS ACADEMICI consensu,

Et nobilissimæ FACULTATIS MEDICÆ decreto;

P R O G R A D U D O C T O R I S,

SUMMISQUE IN MEDICINA HONORIBUS ET PRIVILEGIIS
RITE ET LEGITIME CONSEQUENDIS;

Eruditorum examini subjicit

THEODORUS FORBES-LEITH, A. M.
S C O T U S.

Prid. Id. Septemb. hora locoque solitis.

Tangere enim et tangi nisi corpus nulla potest res.

LUCRET.

EDINBURGI:

Apud BALFOUR, AULD, et SMELLIE,
Academiae Typographos.

M,DCC,LXVIII.



316833

GULIELMO CULLEN, M.D.

INSTITUTIONUM MEDICINÆ

IN ALMA ACADEMIA EDINENSI

PROFESSORI, &c. PRAECEPTORI SUO,

THEODORUS FORBES-LEITH

S. P. D.

ACCIP E, Vir semper mihi colende, hanc parvulam chartam cujus scriptori materiam tua publica praecepta suppeditarunt: Quam, licet juvenilis incuria minus dignam Te Patrono forsitan reddiderit, tamen animus gratus, et hoc ipso audacior, tuo nomine ornavit. Tuas virtutes, omnibus notas, dinumerare, cum modestia tua, tum ingenium meum conatui impar, prohibent. Liceat mihi, publica hac oblata occasione, fructus a tuis praelectionibus, de omnibus fere medicinae partibus, per quatuor annos accepti, consiliorum privatim datorum, beneficiorum collatorum, et amicitiae spectatae, gratias agere, et gratum animum testari.

V A L E.

JOANNI GREGORY, M.D.

USUS MEDICINÆ

IN ACADEMIA EDINENSI,

PROFESSORI, &c. PRAECEPTORI SUO,

THEODORUS FORBES-LEITH

S. P. D.

*PRIMO studiorum labore in lucem edito, et copia tui memorandi facta, si summa quibus a te affectus sum beneficia celarem, ingrati animi forem. Te privatum olim tyro, nuper publicum Praeceptorem studiis pro-
vectior, summo cum fructu expertus sum. Tua monita et praecepta, quibus semper sum usus, te carum animo meo jure reddiderunt. Famae tuae crebrescenti nihil addere laudes meae possunt; quibus igitur abstinens, ob omnia beneficia haud ficto animo hoc tempore gratias ago.*

V A L E,

TENTAMEN PATHOLOGICUM

D E

DELIRIO FEBRILI.

HOMINEM e duabus partibus longe diffimilibus constare, omnes etiam a primis usque temporibus observarunt.

PARS una, ex materia ejusdem ferè naturae ac caeterae rerum partes quae sensuum examini subjiciuntur formata, corpus vocatur.

ALTERA vocatur mens; ea a plerisque philosophis et medicis immaterialis, vel saltem naturae priori omnino dissimilis, habetur.

DE materiali quidem parte, utique legibus obediante quibus caeterae materiae partes reguntur, facilius ratiocinamur; et quo magis materiae atque motus leges, corporisque hominis structura, nobis innotescit, eo justius de mutua inter se harum partium actione ratiocinari dabitur.

A

CUM

CUM autem pars immaterialis quae hominī inest, sola omnium rerum per immensum mundum immaterialium, nobis nota sit, nulla industria leges earum generales investigare, vel quo modo pars nostra immaterialis cum materiali connexa sit, mutuasque earum actiones, intelligere nobis licet.

IN systemate autem hominis, mutua haec actio locum obtinet: Mentis vero operationes ita inter unius partis corporis in alteram actiones interponuntur, ut omnino desperandum sit systematis humani phaenomena ex materiae motusque legibus solis explanare. Difficultas autem tum erit maxima, cum de phaenomenis agamus quae maxima ex parte mentis sunt, et de iis potissimum mentis motibus quos pro morbis habemus.

PLURIMAE autem ejusmodi perturbationes adeo sejunctae esse visae sunt a corporea parte, in quam solam medicus agit, ut arti ejus nequaquam subjectae esse aestimatae sint. Aliquando fortasse res ita se habet; difficile vero admodum est exempla proferre quibus, hac in re, qui sint artis medendi fines quos ultra citrave consistere non debeat, illustretur.

QUANTUMCUNQUE autem mens et corpus inter se distent, vel quamcunque difficile sit cogitatione

cogitatione comprehendere, ne dicam aliis exponere mutuas inter sese eorum actiones; satis tamen erit medico, illas ita conjunctas esse, ut certus unius status certum alterius statum comitetur, adeo ut, in omni quaestione quae de mutua harum affectione fiat, mentis status semper pro dato haberi possit; nec nisi de corporis statu solummodo nobis erit inquirendum.

DE hoc Cel. BOERHAAVII sequuntur verba:

“ STATUS corporis viventis, tollens facultatem exercendae actionis cujuscunque, vocatur morbus. Cujus ergo idea est absentiae requisiti ad exercitium possibile actionis, vel praesentiae repugnantis exercitio eidem. Nec mentio animae facta in hac definitione: Quia corporis statum determinatum idem animae status individue comitatur; et quia medicina, in solum corpus agens, consuetas animae conditiones restituit; tum etiam, quoniam mentis mutata conditio ignoratur, nec bona vel mala noscitur fanitati nisi effectu corporeo jam nato, edito, cognito.”

“ PROINDE

“ PROINDE omnes morborum quorumcun-
 “ que naturae cognoscendae et inveniendae
 “ sunt in variis conditionibus, diversimode af-
 “ fecti corporis bene observatis, enarratis, ex-
 “ plicatisque. Nec juvant quae de principio
 “ animato his intermiscuerunt egregii in arte
 “ nostra viri, ut cuilibet sincero indagatori et
 “ aestimatori rerum apparebit*.”

CUNCTI fere medici sententiam modo me-
 moratam pro confesso habuerunt; cumque ex
 phaenomenis totius systematis humani deduc-
 ta nobis esse videatur, in hac dissertatione ausi
 sumus corporis status qui maximas functio-
 num mentis perturbationes comitantur ex-
 ponere. Facilius autem in notitiam venient
 quae de morbis nomine *vesaniae* comprehensis
 dicenda sunt, si prius mentis sedem et functi-
 ones breviter ostendero.

De Sensorio Communi.

DE parte corporis ex cuius statu mentis functi-
 ones maxime pendeant, dissensiones variae fu-
 ere; Dum alii philosophi contendunt mentem
 nullum sibi proprium habere locum, sed per uni-
 versum

* Institut. Herm. Boerh. 696—697.

versum corpus diffundi: Quam opinionem perpauci nunc sustinent, fereque ut obsoleta neglecta est; donec tandem Cl. ROBERTUS WHYTT, nuper in hac Academia institutionum medicinae Professor, eam quasi resuscitavit, ita tamen ut quaedam sibi propria ponat: Cum intellectum quidem in encephalo agnoscat, mentem tantum sentientem per totum corpus extensam esse credat. Plerique vero physiologi per annos aliquot praeteritos consensere, mentem sedem fixam in aliquo corporis organo habere. Varias et dissimiles de hac re sententiae occurrunt; atque vix quidem pars ullius momenti corporis est quae uno vel alio tempore mentis sedes non existimata est: Exempli gratia, in variis locis librorum qui magno HIPPOCRATI tribuuntur, varia corporis organa animi sedes esse dicuntur; ipsius vero medicinae patris opinio fuisse videtur, mentem in ventriculo cordis sinistro consistere. Illustris HELMONTIUS animum sentientem in stomachi cardia sedere existimavit; et hodie etiam vir clarissimus BUFFONIUS, affectus animi ex diaphragmate oriri probare conatur. Quanquam autem tam diversas de sede mentis inveniamus opiniones, omnes fere eam propriam aliquam tenere

6 DE DELIRIO FEBRILI.

tenere sedem pro certo ponere videntur: Supervacuum igitur mihi foret, argumenta ex unaquaque parte adducta pertractare. Plerisque igitur nostri temporis scriptoribus assentio, unam solam corporis partem aptam esse et ad sentiendum, et ad ideas formandas, retinendas, et in qua etiam eadem de novo per varias rationes excitari possint; vel, ut uno verbo dicam, credo in certa corporis parte esse sensorium commune: Adeoque ejus sedem in cerebro, cerebello, medulla oblongata, et medulla spinali, forsan et in omnibus simul, esse; et, ob multas vero rationes credibile est, intellectum et judicium in encephalo perfici; quin et experimentis probari videtur, medullam spinalem aliquo modo sensui inservire.

De Mentis Functionibus.

ANIMALIUM functiones omnes quae propriae mentis sunt sub his quatuor comprehendi possunt: Sensu, scilicet, memoria, judicio, et voluntate.

RATIO et conditiones quibus mentis hae functiones exercentur in plerisque omnibus hominibus consimiles adeo sunt, ut viam exercendi

ercendi solitam quandam et naturalem statuerere possimus, atque inde eam observare quae insolita et morbofa haberi potest. Veritas vero hujus opinionis, quam summatim nunc ponimus, rectius ex sequentibus elucescet; in quibus per singula plenius eam persecuturi sumus.

1. SENSUS ab uno eodemque objecto orti magnam adeo in diversis hominibus similitudinem inter se habent, ut iis easdem notas adhibere possint, atque inde facile vicissim communicare omnia quae ad sensum pertinent. Hinc fit, ut quum objectum in uno homine sensum excitet specie diversum ab eo quem vulgo excitat in aliis, talem sensum pro falso habeamus, talemque hominem consideremus quasi morbo laborantem. Concludimus quoque, quando ita se res habet, organorum sentientium, aut sensorii, potissimum vero organorum sentientium, praeternaturalem vel insolitam constitutionem fuisse.

2. MEMORIA, quae est a certis causis sensus renovatio, absente objecto unde primo ortus est, communiter aut in plerisque sub hac conditione absolvitur, ut sensus per memoriam
renovatus

renovatus minus vividus sit et valens quam sensus primarius. Itaque inter homines convenit sensum primarium ita a renovato distinguere, ut sensum primarium impressionem nominent, vel sensum magis proprie dictum; sensum vero memoria renovatum per ideam designent. Mens plerumque hujus differentiae conscia est; et quamvis vires vigoresque idearum in aliis hominibus aliae sunt, tamen, quandocunque sensus renovatus eandem vim habet ac sensus primarius, quod quidem fieri potest, de praesenti objecto sibi persuadet; quod ubi fit, neque tamen objectum revera adest, talem sensum pro morbo consideramus. Hujusmodi memoriae conditio oritur forte aliquando a praeternaturali organorum sentientium constructione; sed ubi frequenter magis occurrit sine impressionibus iis oblatis, certius et frequentius vitio sensorii tribuenda est.

3. IDEARUM renovatio per memoriam pendet a consociatione; et vulgo ita procedit, ut, quum impressio praesens sensum efficit, eodem quoque tempore ideam vel ideas prius cum tali sensu consociatas excitet; haeque deinde alias consimili ratione excitent, quae sibi quoque

que olim confociatae fuerant. Per longam seriem aliquando sic progreditur, et ut renovationem talem idearum comitatur observatio eorum que inter sese differunt; in hoc perficiendo cogitatio consistit, atque semper iudicii exercitatio necessaria est. Communiter quidem initium ducitur ab impressione in organis sentientibus praesente; sed ideae etiam renovari possunt sine ejusmodi impressione, et ab impressionibus, ut videtur, protinus sensorio oblatis. Sensorii hae impressiones ad morbos referendae sunt, non solum quatenus efficiunt olim (2.) memoratas, sed etiam quia ideae ex iis ortae insolita prorsus ratione excitantur.

4. CONSOCIATIONES, memoriae fundamentum, vim iteratione acquirunt, et in omnibus hominibus legem constituunt, solitam successionem et ordinem idearum definientem: Quum hoc ita fiat, et comparationes quae consociationibus viam sternunt aequae sint ab omnibus observatae, notatae, et consociatae, ita, quod ad objecta pleraque et actiones hominum attinet, successio est quaedam et ordo idearum plerisque communis; adeo ut om-

nis idearum renovatio, ordine differente et confociationibus solitis contrario, rite admodum pro morboſa conſtitui poſſit.

5. JUDICIUM verſatur in comparationibus objectorum inſtituendis; et perceptio harum comparationum praecipuum confociationis fundamentum ponit. Facultas haec variat in diverſis hominibus; ſed in plerisque eo uſque conſtat, ut ſufficiat ad neceſſaria vitae munera explenda; et cuicunque non iſtiusmodi fuerit, is ex ſanorum numero tollendus eſt.

6. Ex ſenſus lege jam tradita (1.), ex natura memoriae, ex lege memoriae cujus etiam mentio facta eſt (4.), in omnibus qui judicii facultate praediti ſunt, ſit neceſſe eſt in eo exercendo talis ſimilitudo, ut exinde ſolita ejus et naturalis conditio conſtitui queat. Quandoque falſi ſenſus (2. 3.) naſcuntur, vel cum mens ab uno ſenſu vel idea ad alias communiter cum his nexas haud progreditur, et praefertim cum ex una idea progreditur ad alias nequaquam cum ea nexas nec prius confociatas, judicium falſum

sum fieri oportet; et in hoc casu iudicium ut morbidum consideramus.

7. Ex sensibus et harum ideis, vel cum iis oriuntur sensus reflexi doloris et voluptatis; exque his deinde varii voluntatis modi qui locum in animi commotionibus et appetitione habent: Sed latitudo haec plerisque intra certos fines constituta est; et quodcunque extra hos egreditur vel in gradu voluptatis aut doloris ex sensibus discretis, vel in gradu commotionis vel appetitionis ex sensibus reflexis, id omne pro praeternaturali et morbida conditione recipiendum est.

His peractis, nunc licet ad propositum redire.

De Vesania in genere.

QUANQUAM medici, a primis etiam temporibus, de morbis mentis verba fecerunt; tamen nuper solum conati sunt vel eos inter se distinguere, vel regulas ad usum necessarias ponere: Atque nunc etiam, quamquam hi morbi libris omnibus systematicis locum obtinent, nullo tamen ordine connectuntur, sed per omnes librorum partes dispersi jacent; vel morbis variis annexi sunt, ab iis prorsus alienis,

alienis, et qui nullo modo mentis morbi haberi debent.

ERROREM hunc solus fere corrigere nifus est Cl. SAUVAGESIUS, plenamque morborum ordinationem expedire. Maximum vero commodum illum attulisse morbos mentis in unam classem referendo, ex hoc manifesto apparet; quod necessitas de iis eodem loco differendi omnibus apparuerat pathologis, qui etiam communem eorum originem monstraverunt, affectionem scilicet cerebri topicam. Multa tamen in divisione Sauvagesiana parum mihi placent, et etiam legibus nosologicis ab ipso latis contraria sunt.

DEFINITIO et divisio morborum mentis generica infra profertur; quibus ordinem methodicum non solum servare, sed etiam ad causas proximas accommodare, conati sumus: Primo autem offertur divisionis conspectus, ut partium ejus nexus appareat: Explicationem plenioram et rationes postea dabimus eorum de quibus ambiguitas ulla oriri potest.

Divisionis

Divisionis Vesaniae Conspectus. ‡

VESANIA est imperfecta vel erronea mentis functio permanens, et a vitio organi sentientis non pendens. ‡

Art. I. Mentis functio imperfecta.

Gen. I. FATUITAS est nulla vel parca, ultra infantiam permanens, comparatio eorum quae interfint aut differant sensus inter se; indeque nulla memoria ad officia vitae sufficiens. ‡

2. AMNESIA, memoria deleta est.

II. Mentis functio erronea.

1. PARAPHROSYNE, a causis externis iudicium male sanum.

2. MELANCHOLIA, a causis internis, de una re tantum cui inhaeret animus, iudicium male sanum, sine febre.

3. MANIA, a causis internis de omnibus vel plerisque rebus iudicium male sanum, sine febre.

4. DELIRIUM, a causis internis iudicium male sanum, cum febre.

~~¶ Conspectus~~

Conspectus Explanatio.

VESANIAM definivi esse *imperfectam vel erroneam mentis functionem permanentem, et a vitio organi sentientis non pendentem.*

CUI forsan objici possit, Vesaniam minus recte ex *imperfecta et erronea* mentis functione definiri; quia signa negativa vix unquam ideam dant perspicuam. Prius vero sani functionum status descriptionem praemisimus, ex quo iudicium haberi potest de aliqua earum laesione; unde omnes, credo, de imperfecti-one et errore non minus rite judicare possunt, ac si certum aliquod signum protulissemus; quod in hoc casu fieri nequit, cum nihil in rebus occurrit cum quo mentis functiones comparari possunt.

DIXI ideo necesse esse ut affectio sit *permanens*; quia ex iis morbis excludere in animo fuit momentaneas quasdam affectiones, ut furorem et extasin, quibus mentis functiones quidem perturbantur; quae, cum protinus abeant, neque morbosum relinquunt statum, latitudinem sanitatis non excedunt.

MORBOS mentis, *a vitio sentientis organi pendentes*, rite mihi excludere visus sum ab iis

ex sensorio ipso affecto ortis. SAUVAGESIUS vero, in primo et secundo ordine, Hallucinationum scilicet et Morositatum, praecipue comprehendit morbos ex sensus vel appetitus (quod idem esse credo) organis ortos.

A. I. G. I. FATUITATEM dixi esse, *ultra infantiam permanentem, nullam vel parcam comparisonem eorum quae intersint aut differant sensus inter se, cum nulla memoria ad officia vitae sufficiente.*

Hoc genus imperfectae mentis functionis libris omnibus medico-practicis et pathologicis plerisque prorsus omittitur; cum raro medicum oporteat mentem ei adhibere, quia nunquam fere sanari possit; aequae tamen in nosologia recenseri meretur ac plurimi alii morbi pro immedicabilibus habiti.

STATUS idem, ac iste fatuorum, in infantia occurrit; sed non est praeter naturam, et ergo non pro morbo habendus: Hinc est quod fatuitatem *ultra infantiam permanere* diximus. Notandum tamen est, infantium fatuitatem aliquando a naturaliter inepto statu ex vultus habitu discerni posse.

MEMO-

MEMORIAM in fatuitate ideo diximus *non ad officia vitae sufficere*; quia homines, alioquin fatui in aliquibus rebus, memoria strenua satis gaudent, praesertim eorum quae ad locum et tempus spectant; et illa memoria non ad officia vitae sufficit.

2. PER *memoriam deletam*, intelligo morbum non esse congenitum, sed memoriam et mentis functiones antea sanas fuisse. Talis memoriae defectus ex variis causis oritur, quas vix enumerare possumus. ✱

AMNESIA vel oblivio in senectute frequenter occurrit, et ut plurimum morbosa; cum multos cernamus homines, etiam ad vitae extremum finem, quanquam aliter debiles, mentis tamen functionibus sanis et validis uti; adeo ut oblivio senilis semper fere pro morbo habenda sit, neque unquam ex amnesia, perinde ac infantium status ex fatuitate excludendus est, quia secundum naturam est.

A. II. G. I. PARAPHROSYNEN posui *a causis externis iudicium male sanum*. Haec affectio facies varias induit, et, causa excepta, nullo alio modo distingui potest ab aliis vesaniae generibus. Aliquando enim sine ulla febre occurrit;

✱ *Senectute, 116*

rit, aliquando etiam febris eam comitatur; adeo ut unus idemque morbus in his diversis conditionibus alioquin ad diversa genera, maniam scilicet et delirium, ablegandus sit.

SUB hoc genere, omnem vasaniam comprehendo a causis externis sive per ingesta sive per aliter applicata.

2. DE melancholia affirmavimus esse *judicium male sanum in una re*. Nomen, quamvis ex hypothese falsa illatum, quasi morbus a bile atra in cerebrum transmissa oriretur, tamen nunc etiam retineri potest, quia apud medicos diu invaluit et, hypothese deserta, arte est receptum.

DEFINITIO hujus morbi superius tradita, a definitione ARETAEI haud multum distat: ARETAEI melancholiam definientis haec sunt verba: “Est animi angor in una cogitatione defixus, eique inhaerens, absque febre.” Sed Ill. GER. VAN SWIETEN assentio, angorem animi minime pro signo semper praesente habendum esse *. Nam quanquam, ut plurimum huic morbo moestitia annexa est, ta-

C

men

* Van Swieten comment. in aph. Boerhaav. tom. 3. p. 460.

men mea sententia natura affectus comitantis, moestitia, timor, gaudium, an spes sit necne, nihil interest. Et ad hunc morbum referri volo omnes qui aegrotant attentione in unum objectum fixa, si per hanc attentionem ideae quae ad id objectum pertinent non sint adaequatae causis excitantibus: Hujusmodi melancholiae sine moestitia comitante plurimae historia medica recensitae sunt; et frequenter adeo in usu quotidiano occurrunt, ut exempla hic proferre supervacuum foret.

3. QUANDO maniam definivi, esse *judicium male sanum de omnibus vel plerisque rebus*, de industria singularem quemcunque animi affectum omisi; exempli gratia, furorem a viris Illust. SAUVAGESIO et SWIETENIO comprehensum.

MANIAM quidem plerumque concitatiores animi affectus comitantur, cum oculis trucibus, insigni rubore, et pulsu, ut credo, pleno et valido: Haec tamen minime perpetua sunt; et species maniae datur, ut postea de delirio observabitur, in qua adfunt temperatiores animi affectus, cum oculis trucibus, debilitate maxima, pulsuque parvo et tremulo.

PARS quae restat hujus dissertationis de delirio febrili versabitur; cujus ergo, primo mihi necesse est divisionem aliquam proferre.

De Delirio in genere.

DELIRIUM adpellavi, *judicium male sanum cum febre.*

VOCE Delirium non, uti plurimi auctores, utor, ad totam vefaniae classem designandam: Et, ni fallor, cum nomina usu nondum fancita sint, mihi licet nomen delirii imponere ei vefaniae generi quod a plerisque Delirium Febrile dicitur; eoque magis, quod nomina jam quodammodo constituta sunt, quae caeteras vefaniae divisiones denotent. Indefinitos autem verborum usus esse, ex hoc perspicue apparet, quod adhuc in usu sunt vocabula HIPPOCRATIS, apud quem voces παραπροσυνη, παρακοπη, ληρωση, παραληρωση, et quaedam aliae, promiscue usurpantur ad delirium leve, vel etiam vefaniae levius quodlibet genus, significandum. Graviores autem gradus vocantur ἐκστηση, μαννη, ἑκμαννη, et similiter. Ex quibus etiam voces Latinae formantur, significationis aequae indefinitae, quales sunt Delirium, Paraphrosyne,

phrosyne, Amentia, Desipientia, quae sunt omnes in usu promiscuo apud scriptores etiam recentiores. Antiquiores quoque auctores delirium febrile distinguere conati sunt, secundum functiones mentis ab eo affectas. Quae divisio quidem esset optima, si nunquam plures simul laesae essent. Sed vix unquam dici potest, unam earum solam eodem tempore affici; et propterea divisio necessaria visa erat, etiam iis qui hanc primam constituerunt *. Omnes delirium dividere conati sunt ex habitu totius corporis, et ex theoria sua de morbi natura, quibus etiam adjungunt gradum et speciem affectionis mentis: Hujus divisionis vocabula Phrenitis, Paraphrenitis, Delirium Ferox, Delirium Mite, exempla sunt. Divisiones hujusmodi certe perquam idoneae sunt ad varietates constituendas; harum autem multas oportet in unam speciem conjungere, quae definiatur ex signis semper comitantibus magisque constantibus quam mentis affectionis gradus, vel morbi sedes dubia: Et quae ipsa signa aliquo modo morbum facere existimanda sunt, vel morbi causae effectus esse necessarius.

HUJUSCEMODI

* Sennert, institut. lib. 2. part 3. sect. 1. cap. 7.

HUJUSCEMODI delirii divisionem fecisse mihi videor, ut primam delirii speciem ex signis impetum sanguinis auctum denotantibus constitutam; alteram vero ita ponam ut sit delirium in quo hujusmodi signa non insunt.

SUB his omnia, ni fallor, deliria includi possunt; nec mihi videtur ulla subdivisione in pathologico tractatu opus esse, uti clarius, ex illorum historiis, spero, patebit.

Delirii cum impetu sanguinis aucto Historia.

HUJUS delirii advenientis signa sunt: Pulsus validus, vultus rubecundus et turgidus; pulsatio insolita in arteriis temporalibus; oculi nitentes et inflammationis speciem praeferentes; caput plerumque dolet, cum sensu in eo ponderis et compressionis. Respiratio rara est et laboriosa; luce quamvis levissima oculi praestringuntur; et sonus etiam minimus aures offendit. Totius corporis sentiendi facultas augetur. Animi affectus violentiores fiunt quam ex iisdem causis in sanitate; nugae frequenter irae vel gaudii graves inducunt accessus; objecta tamen externa aeger adhuc percipit, et de iis more solito judicat

dicat et ratiocinatur; caeterum nunc vix ulla apparet mutatio, nisi quod vultus insolita alacritate perfunditur. Si forsan dormit vel somnolentus est, frequenter secum mullitat, mentisque functiones turbatae videntur. Si quis cum illo loquitur, respondet; sed plerumque non omnino congruenter ad quaestionem. Et si forte dormit, somnus nunquam altus est, sed variis insomniis conturbatus; corpusque homo perpetuo in lecto jactitat. Experrectus, aliquantisper omnia insomniorum figmenta vera, neque solum in mente sua sita esse, credit; et de iis ita usque loquitur donec ex somno omnino solutus sit. Paulo postea, etiamsi non statim ex somno expergescitur, idearum confusio apparet. Vultus ejus non naturalem refert aspectum, et perceptio perturbatur. Qua de causa, multa se videre et sentire putat, quae adstantium nemo percipit; saepe vero sapienter aliquamdiu loquitur, quanquam nequeat attentionem diu in rem ullam infigere. Animi affectus gradatim minus causis externis respondent; ideae repente e memoria elabuntur. Saepe enim cibum vel potum flagitat; quando autem afferuntur, prorsus obliviscitur se unquam rogasse: Ideaе variae ridiculae mentem infestant,

festant, plerumque colloquiis praeteritis vel objectis alienae. Omnia haec signa gradatim augentur, donec tandem omnium rerum notitia eum deferat; et multa coram oculis esse fingit, quae prorsus non sunt. Jam vix de qualibet re ratiocinatur, cum antea paucis solum erravisset; affectus animi praeter modum excitantur; aliquando etiam furor supervenit; et interdum, sed rarius, timor, moestitia, vel gaudium, eum afficiunt. His etiam temporibus, vultus feritatis imaginem praebet, quae in homine sano nunquam cernitur. Ad hoc quorundam organorum sentiendi facultas assidue augetur, et postea levi etiam stimulo affici possunt; quanquam ex statu mentis morbo et internis impressionibus quibus frequenter occupatur, id non tam plane apparet ac in priori morbi stadio. Circa hoc tempus, aeger floccos e stragulis perpetuo digitis carpit, vel aëra manu prensat, quasi aliquid volitans in aëre et correptu dignum videret. Ubi haec signa per tempus aliquod perdurarunt, morbo vel in mortem tendente vel in fanitatem, omnia gradatim evanescent, et maxima supervenit ad impressiones hebetudo. Adhuc vero mentis functiones perturbantur; sed animi affectus minus violentes fiunt; iudicii error

error stupore celatur; si aeger e morbo convalescit, sentiendi facultas gradatim redit; et tunc pari gradu memoria et omnes mentis functiones restituuntur; quanquam saepe falso de rebus nonnullis per aliquod tempus judicat et ratiocinatur, alioquin sanus.

SIMULAC felix advenit crisis, urina, antea rubra et nullum sedimentum deponens, nunc copiosum ostendit sedimentum. Pulsus, per totum morbi cursum, plenus, validus, et frequenter durus, et pulsatio valida, ut superius dixi, in arteriis temporum sentitur. Superato stupore, pulsus minus frequens fit, et minoris etiam duritiei si aeger e morbo evafurus est; si non, durus et frequens gradatim debilior futurus, donec tandem convulsionibus e medio aeger tollitur.

HAEC plenum hujus delirii cursum efficiunt. Frequenter non omnia haec stadia percurrit, nec tam evidenter in ullo stadio se ostendit: Omne vero delirium, in impetu sanguinis aucto constans, ad hoc genus referre volo, etiam si ex omni parte levius appareret. Distinctionem ab auctoribus plerisque acceptam, ex animi affectibus morbum stipantibus deductam, superius tam incertam esse dixi ut vix unquam ea uti possimus: In eodem enim morbo

morbo etiam in phrenitide, intra horae dimidii spatium, delirus furore, timore, moestitia, et gaudio afficitur; ergo etsi furor hoc delirii genus plerumque, vel violentus aliquis animi affectus, comitetur, tamen id delirium nollem cum auctoribus Ferox nominare; cum historiae multae a medicis traditae sint, quibus hoc delirium nullo affectu animi violento per totum morbi cursum distingueretur*.

DELIRIUM hoc occurrit in phrenitide, inflammatione ipsius cerebri, febrium intermittentium calore, febribus inflammatoriis continuis, paraphrenitide, et plerisque inflammationibus topicis, quas totius corporis febris comitatur.

Delirii sine impetu sanguinis aucto Historia.

DELIRIUM sine sanguine citato aliquando, cum quis morbo corripitur, apparet. Saepius vero magna functionum animalium debilitas praecedit, etiam pulsus parvus, tremulus, et perturbatus, non multo autem naturali frequentior; dolor in aliqua capitis parte, quem

* Van Swieten de phrenitide.

aeger vix indagare potest; anxietas maxima; tinnitus aurium; vertigo et oculi hebetes apparent: Vultus etiam pallidus et languidus videtur; urina parca pallida, aliquando etiam ut aqua limpida, et nullum deponens sedimentum, nubecula solum levi in ea natante. Calor et sitis jam fere naturales sunt; corpus aliquando frigescit, et horror supervenit; cui statim calor succedit, et sudor in pectore et capite qui rarius ad extrema pervenit. Vultus nunc rubescit, nunc, calore et sudore post breve temporis spatium desinentibus, iterum pallescit: Quoties aeger e somno excitatur, ideae ejus perturbatae et obscurae apparent; frequenter secum musitat, et timore vel saepius terrore afficitur. Qui affectus in vultu et gestibus apparent, quanquam saepe majores sunt quam pro causae cujusvis nobis manifestae magnitudine, vel pro his quae ex aegro scissitando rescivimus, qui tamen saepe responsus naturales reddere potest. Attentio autem et ideae dissipantur, ut breviter tantum respondeat et statim argumenti obliviscatur; nisi inde adeo afficitur ut per tempus quoddam de eo secum cogitet et loquatur: Hujusmodi cogitationes delirium antea mite in furorem aliquando convertunt. Sed in hoc genere

nere furor raro supervenit; ac potius idearum confusio quam delirium ferox occurrit. Delirium vero sensim augetur; quanquam alia signa nullo modo mutantur, nisi quod debilitas crescit et stupor advenit; delirus frequenter vigilans dormire videtur, et semper secum mussitat: Quod si in somnum incidit, is turbatur et terrore saepe excutitur, ut experrectus raro conscius sit se dormivisse. Ideae nunc prorsus perturbantur; pulsus debilis, inaequalis, et frequentior est quam antea; in syncopen homo pronus est. Sudores frigidi promanant; rogatus linguam quidem extendit sed tremulam, quamque retrahere vix meminit; auditus minus acutus fit; delirium constans; pulsus frequentissimus; extrema corporis frigescent, cum forsitan truncus sudore madidus sit. Coma augetur, et vix ad colloquendum excitari homo potest: Jam foeces et urina in lecto profluunt; ille nec potum nec cibum quaerit, sed eos allatos frequenter accipit; quibus rebus torpidus magis quam irrationalis esse apparet. Coma gradatim augetur; sudor glutinosus, gelidus, ex pectore et fronte, diffluit, mortis advenientis brevi miserum rapturae praenuncius.

Hoc

Hoc delirium frequenter nullum cursum certum sequitur, sed cum signis prius notatis, et ex aliqua systematis mutatione, adoritur. Recedit vero frequenter, et iterum iterumque redit, ut saepe apparet in febribus intermittentibus, ubi delirium in frigoris paroxysmo occurrit; sed evanescit primo paroxysmi caloris aggressu, iterumque redit sequente frigoris paroxysmo. Idem etiam in febribus aliquibus continuis occurrit; sed exemplum hujus delirii permanentis clarissimum in febre nervosa notatur; et prope finem fere omnium febrium lethalium idem hoc delirium occurrit.

De Causa Delirii proxima.

ORIGO idearum, et mentis functionum in sanitate natura, adhuc in tenebris jacent: Vix igitur credendum est nos perspicue posse causas eas perturbantes exponere: Talis disquisitio in viam prorsus ignotam nos inducit; ubi, si aliquantum ingredi posse videmur, brevi tamen ad impedimentum pervenitur, quod ulteriorem transitum praecludit; arctus enim inter corpus et mentem nexus, pars est immensi operis Magnifici omnium Creatoris,

Creatoris, quae a prima fabrica ita penitus obvoluta esse apparet, ut eam penitus expendere omnino desperandum sit. Observatio et experientia, doctrinae humanae fundamenta, defunt; et jamdudum pro rato habitum est, cultro anatomico mentis cum corpore nexum nos nunquam explorare posse. Ob hanc causam multi aditus exquirere destiterunt, qui insuperabili hujusmodi obstaculo terminantur, quasi ad nullum utilem finem ducentes; crediderunt etiam se toto itinere devio ignem fatuum in mentibus suis situm secutos esse, qui falsam sui naturam ideo ostendebat, quia ad viae finem eos nunquam erat perducturus. Verum si mentem accuratius adhibuissent, cernere potuissent rudiores tantum naturae partes in conspectu nostro positas, et causam primariam, in omnibus fere quae ad doctrinam pertinent, latere. In spatio jam emenso, nostri conatus non omnino frustra fuisse; contra, in via multa utilia invenimus. Idem spero futurum esse, si functiones intellectus occultas investigare conabimur; inventio autem omnis pluris facienda est, ob difficilem viae insistendae naturam rerumque investigandarum subtilitatem.

FORSITAN

FORSITAN aliquis credat, priusquam in causas delirii ipse inquiram, sententias quae de hac re diversis invalere seculis recensere me debuisse. Fas tamen mihi fore haec praetermittere confido, cum plurima quae de hac re tradita sunt ipsi quoque auctores minime sufficere agnoverint.

MENTIS perturbationes, a tepidis vaporibus, ex uno aut altero corporis organo in cerebrum dimanantibus, oriri, variosque liquores in cerebrum effundi, quae antiquorum sententia erat, perpendere omnino supervacuum esset.

NEQUE plus mihi ad rem foret inquirere, quod Stahlianis visum est, an anima rationalis nobis insit, quae sensus, ideas, motusque omnes sponte praestet; praesertim cum mentis actionem per corporis rationem nos solum cernere antea notaverim. Aut si quid ejusmodi sine dubio existere crederemus, omnis fere investigatio de statu corporis, mentis affectiones comitante, nobis praeccluderetur.

RECENTIORES physiologi, aquosum aliquem liquorem in cerebro assidue secerni, et in totum corpus per nervos diffundi, scripsere. Fingunt etiam liquorem hunc motu suo impressiones
ad

ad communem nervorum originem deferre, ideoque sensus et inde idearum causam esse : Omnes quoque corporis partes per illum moveri, mentisque perturbationes ex vitio in ejus habitu vel cursu oriri, credunt. Quem liquorem inesse corpori inde demonstrare conantur, quod cerebrum glandulae speciem refert, et, quod nervis arctius ligatis, impressiones infra ligamen factae nullum sensum edunt, neque ullo animi nisu pars corporis in quam nervus iste pertinet moveri potest.

QUAMVIS vero cerebrum glandulae similitudinem habeat, et aliquid in eo fortasse discernatur ; ob plurimas tamen rationes, opinio jam tradita incertis fundamentis inniti videtur : Quod sequentibus demonstrare conabor.

1. EXPERIMENTA omnia demonstrant, motum a liquore quovis aquoso transmitti non posse, tanta celeritate quanta sensus impressionem sequitur.

2. SOMNI atque vigiliarum vices mutuo sese excipientes, nulla ratione per motus

tus liquoris assidue secreti, in somno collecti, rursusque in vigiliis consumpti, explanari possunt. Nam,

a. HORA solita somnus advenit, quamvis corpus nullo labore defatigatum est.

b. QUANQUAM certus laboris gradus somnum inducit; tamen, si corpus magno labore defatigatur, somnus e contrario depellitur.

c. SOMNUS etiam illos pariter opprimit qui mentem solam aliquantulum exercuerunt, ac eos qui mentem in aliquam rem strenue adhibuerunt.

d. MENTIS exercitium insolitum, eodem modo ac corporis labor maximus, somnum depellit.

e. STIMULI varii, qualis est theae infusae, ad somnum proclivitatem, tollunt, atque etiam quemlibet jam sopitum certi stimuli temporis puncto excitant; quod tam repente fieri non posset ex liquoris in cerebro secreti incremento.

f. SI quocunque modo solito diuturnior vigilia fuit, somni cupido omnino discedit; et ante solitam dormiendi horam raro iterum redit.

3. MEDICAMENTA quae sedantia vocantur eundem fere quem somnus corporis statum inducunt; cujus rei nulla ratio reddi potest ex aliquo quod assidue fecerni credatur, multoque minus motus, isto aquoso liquore nulla vi elastica praedito, peragi possunt.

NEQUE quidem horum motuum causa esse potest tremor aliquis per nervorum fibras, fidium chordarum instar propagatus, quod nonnullis visum est: Nervorum enim fibrae nequaquam ita tensae sunt ut elasticos motus edant.

SOLA horum motuum quae sequitur ratio mihi satisfecit: Illos scilicet effici liquido aliquo subtili vi elastica praedito, oscillationi et vibrationi apto, quodque aliquo modo cum nervorum medulla connectitur; nexus autem eorum intelligi nequit, nisi liquidum hoc aetheris, quem NEWTONUS omnem naturam pervadere demonstravit, pars quaedam existimetur, quae varias possit induere dotes variasque acquirere facultates pro corporum quibus adhaeret natura aut copia qua adhaeret.

Ex plurimis quidem rationibus credendum est, electricitatis phaenomena liquido hujus generis peragi; variisque modis illud in ma-

jore copia aggregari posse exploratum est. Corpus circa quod ita aggregatur electricum excitatum dicimus; quod, quanquam alias omnino iners sit, corpora ei nunc admota valde afficit. Compertum quoque est, corpora electrica in certa conditione hanc facultatem amittere. Sulphur fusum nullam vim electricam ostendit, sed Conductoris, quod vocant, facultate fungitur; quamprimum autem concretum est, electricum excitatum devenit. Multa quoque experimenta demonstrant liquidum hoc, temporis momento, vel imminui vel accumulari posse.

FACILE vero intellectu est, mutationem aliquam in medulla systematis nervosi, eadem celeritate, fluidum annexum motibus illis prius aptum, minus habilem reddere posse; quod etiam per res fluidum ipsum afficientes fortasse accidit.

HIS positis, longe facilius quam ex fluidi alicujus quotidie secreti opinione intelligemus qua ratione stimuli somnum depellant, statumque corporis activum et excitatum inducant: E contrario, sedantia agere videntur abducendo fluidum accumulatum quod corpus excitat. Maxima autem difficultas occurrit in periodico somni reditu explicando.

. Aliae

Aliae tamen ejusmodi periodi in systemate occurrunt, quorum nulla, ex secreto quovis, sed manifesto ex nervorum affectibus, pendet.

FACILE intelligere possumus quomodo motus propagentur fluido subtili et elastico, quod credimus esse ejusdem naturae cum omnium corporum aethere; praesertim cum aliunde notum sit, aera communem, quanquam infinite aethere densiorem, posse sonum per tremores facere. Omnes auditus et etiam tactus impressiones manifesto corporibus nostris per tremores communicantur; et, praeterea, ob multas rationes credendum est, omnia sentientia organa impressiones eodem modo accipere. Unde quidem argumentum validissimum oritur ad opinionem hancce confirmandam; motum scilicet per fluidum elasticum in corpore nostro communicari *.

Non solum credere possumus, totius systematis nervosi mutari posse excitationis gradum, sed etiam quarundam ejus partium; mutata autem excitatio originis nervorum, quam antea sedem esse sensorii communis diximus,

* Haec, in dissertatione hac aestate edita a viro optimo Gustavo Richardo Brown, M. D. de ortu animalium caloris fusius reperiuntur, p. 29. 30. &c.

diximus, five in toto five in parte, idearum et naturam et cursum sine dubio mutabit.

NEQUAQUAM ponimus, cerebri certam aliquam partem ad ideas recipiendas vel retinendas adaptatam esse; statuimus contra, sensorium univcrsum aequabiliter excitari debere, ut cursus idearum consuetus perficiatur. Ita excessus vel defectus excitationis cujusunque sensorii partis perturbationem mentis functionum protinus inducit; et verisimile est, ejusmodi aliquid causam omnis vesaniae esse.

Cum somnus primo obrepit, et priusquam stupor plenus inducitur, aut excitatio totius sensorii ablata est, pars ejus adhuc vigilare videtur; ex qua ideae quidem oriuntur, sed cursum consuetum non sequentes. Eadem quoque cerni possunt, antequam e somno penitus experrecti sumus, quo tempore etiam partem quandam sensorii non excitari credendum est. In somno denique interturbato, quando variae nos illudunt imagines, quae plerumque ortum ducunt ex impressione in sensorii partem facta, per quam illa pars excitatur, dum partes reliquae sopitae manent, functiones mentis et cursus idearum solitus perturbantur.

IN excitatione restituenda, postquam ea corporis vel mentis labore adempta est, omnes neque enumerare neque explicare conatus sum naturae rationes. Harum una tamen necessaria nobis memoranda est, quippe quae praecipue requiritur ad excitationem faciendam et conservandam; est autem status certus actionis cordis et arteriarum quo sanguis ad caput propellitur impetu requisito. Omne corporis organum habilius ad impressionem recipiendam fit impetu sanguinis in eo aucto, quod manifestissime in inflammationibus apparet. Atque insuper notandum est, quod cum sanguis magno impetu per corpus transit, alacritas ad actiones peragendas augetur, et mens vegetior redditur: Contra, si copia quaevis magna sanguinis detrahatur, excitatio sensorii perit et syncope supervenit.

Ex hoc crederemus, ex solo aucto sanguinis impetu, et inde aucta sentiendi actione, tum organorum sentientium, tum ipsius sensorii, perturbationem mentis functionum oriri posse: Verum experientia rem aliter se habere docet; nam saepe impetus maxime augetur sine ulla mentis functionum perturbatione, vel etiam sine majore mentis affectione, nisi
quod

quod idearum cursus magis rapidus fit. Ex hoc evidenter apparet, impetum sanguinis auctum nunquam per se vefaniam efficere; sed obstructionem vel excitationis defectum in aliqua sensorii parte insuper necessarium esse.

In primo delirii genere, stimulus communis sanguine in cerebrum appulso functiones mentis perturbare nequit; sed impetus incrementum requiritur, dum obstructio vel excitationis defectus in quibusdam sensorii partibus occurrit: Hoc etiam probatur, per delirium in paroxysmo caloris intermittentis febris occurrens, quod paroxysmo sublato tollitur.

E contrario, in secundo delirii genere, impetus sanguinis minuitur; et dum partes sensorii aliae excitationem retinent, obstructio vel excitationis defectus in reliquis functionum perturbationem efficit. Haec autem, vi cordis et arteriarum aucta, frequenter depelluntur; exemplo est delirium in stadio frigoris febris intermittentis, quod saepe evanescit simul ac calor adoritur.

OBSERVATIS autem effectibus mutationum systematis in his duobus deliriis quae in febribus

bus

bus intermittentibus occurrunt, regulae quaedam practicae deduci possunt.

IN delirio primo, ubi impetus sanguinis augetur, isque in caput imprimis adfluit, ut molestiae ab impressionibus lucis et soni, et pulsatio arteriarum temporalium insignis, ostendunt, remedio sunt, sanguinis missio, regimen antiphlogisticum, et quicquid a capite sanguinem revocat.

IN secundo vero, medicamenta stimulantia, qualia sunt vinum, aromata, et omnia quae sanguinem citant, danda sunt, ad aequabilem efficiendam sensorii excitationem. Et frequenter in febribus nervosis observatum est, delirium remediis istis tolli. Mihi non necesse est cautiones omnes usui necessarias hic proferre, vel expendere quantum ea quae de delirio dicta sunt caeteris vefaniae generibus conveniant; quippe cum non de singulis verba facere, sed de delirio in genere differere, decreverim.

F I N I S.

